



5 Juñu 2020

Mensajen husi Embaixador Austrália nian iha Timor-Leste, Peter Roberts



Bemvindu mai iha Edisaun dalimak ba ami nia buletin informasaun COVID-19. Ha'u haksolok tebes atua nota katak laiha kazu foun ba COVID-19 mak deteta ona iha Timor-Leste husi semana hirak liuba, ida ne'e signifikante katak Timor-Leste mantein ninia pozisaun laiha kazu ativu mak ita hatene. Ida ne'e hanesan susesu estrordináriu ida no ida ne'e katak Timor-Leste, Ministériu Saúde, pesoál hirak ne'ebé mak serbisu iha liña frente no Timor-Leste nia parseiru sira hotu inklui mós Organizasaun Saúde Mundiál bele orgulhu ba ida ne'e.

Kontente tebes hare serbisu-fatin no atividade negósiu balu ne'ebé hahú neneik ona hodi hala'o fali, mantein nafatin medida estrita hijiene nian. Kritiku tebes atu ita nafatin foka ba iha asaun prevensaun no preparasaun hodi haseesan husi períodu infesaun segunda ronda.

Alemde fornese asisténsia ba Timor-Leste hodi hatan ba COVID-19 husi componente saúde nian, Austrália mós daudaun ne'e fó apoio halo mitigasaun ba impaktu ekonómiku ne'ebé mak signifikante. Liu hosi tarjetu kalkulasaun fiskál, Austrália tulun Timor-Leste hodi hakma'an dezafiu finanseiru mai husi COVID-19 no apoia ba rekoperasaun ekonomia.

Iha semana rua kotuk liu ba, Austrália:

- 01** Asina ona konkordánsia foun ho montante osan Dolares Austrália millaun hitu (7) hodi haforsa comunidade nia reziliénsia no ba rekoperasaun ekonómiku. Fundus hirak ne'e sei fornese direta ba suku sira hotu iha Timor-Leste – kria kampo serbisu, estimúla atividade ekonómiku lokál, no harii infraestrutura hirak ne'ebé mak kritiku hanesan bee, saneamentu no sistema irrigasaun. Fundu ne'e sei entrega atravez Timor-Leste nian Programa Nasional Dezenvolvimentu Suku, ne'ebe hadiak padraun moris hodi permite comunidade hodi hili no harii rasik projetu infraestrutura ne'ebe ho skala kik.
- 02** Apoia ona Ministériu Sosiál Solidaridade no Inkluzao ho preparasaun ikus ba pagamentu finanseiru emerjénsia ba uma-kain hirak ne'ebé moris ho rendimentu kiik. Austrália fornese ona osan ho montante hamutuk Dolares Austrália rihun-atus-ualu-lima-nulu (850,000) resin ba apoia lojística, formasaun no dezeña sistema foun hodi bele halo pagamentu importante hirak ne'e ba uma-kain sira iha Timor-Leste laran.
- 03** Apoio ona negósiantes lokál hodi adapta ba oportunidade ne'ebé mak mosu husi COVID-19. Ho apoia husi Austrália nia Market Development Facility (MDF) ba Timor-Leste nia fábrica ropa primeiru - Mahanaim Garment and Manufacturing – hodi bele hahú halo máskara hena atu bele hatan ba demanda iha merkadu.
- 04** Fornese ona osan ho montante Dolares Austrália rihun-atus-lima (500,000) liu hosi Austrália nia programa TOMAK hodi apoia seguransa ai-han, nutrisaun no ba subsisténsia moris responde ba COVID-19. Ami nia apoia mós hasa'e produsaun agrikultural lokál atu nune'e iha ai-han ne'ebé nutritive ba povu hodi bele konsumo no ba agrikultór sira atu bele fan iha merkadu.



05 Tau atensaun atu ema fila-hikas fali ba serbisu ho seguru. Ezemplu mak, liuhosi Austrália nia programa apoia estrada rurál ami hala'ò serbisu hamutuk ho Ministériu Obras Públika hodi apoia prátika serbisu seguru COVID-19 no prátika ijéniku ba iha fatin ne'ebé sira serbisu ba.

06 Asegura katak Austrália nia voluntáriu sira kontinua sira nia serbisu importante sira ba apoia organizaun parseiru sira iha Timor-Leste ho dalan lansa iniciativa Serbisu Voluntáriu Remotas (Remote Volunteering). Ho dalan ida ne'e loke dalan ba voluntáriu sira ne'ebé mak daudaun ne'e fila-fali ba Austrália atu kontinua hala'ò serbisu husi ne'ebá.

07 Liuhosi Programa Kooperasaun Defeza, Austrália asiste F-FDTL hodi hala'ò sira nia responsabilidade iha área seguransa nian durante períodu Estadu Emerjénsia ho dalan tulun hadi'ak serbisu esensial sira iha baze militar Baucau, no fornese rekomendasaun no konsellu ba postu seguransa foun sira iha fronteira.

Obrigadu barak ba ita nia tempu hodi kontinua tuir informasaun hirak ne'e no ativu nafatin hodi responde ba COVID-19. Ami nia buletin informasaun tuir mai sei fó sai iha fulan Juñu nia rohan. Antes to'o iha ne'ebá ami espera ema hothotu saudavel no seguru nafatin no ami hato'o obrigadu ba ema hothotu nia kontribusaun ba esforsu hamutuk hodi luta kontra COVID-19.



Hana Silva

Hana Silva mai husi Munisípiu Lautem nu'udar Timoroan ida husi sira rihun ida atus ida resin ne'ebé ohin loron servisu hela iha Austrália, hola parte iha ami nia programa eskema mobilidade traballadór. Hana simu ona tulun atu kontinua nia servisu iha Austrália durante períodu pandémia COVID-19. Bainhira nia fila ba Timor-Leste nia iha ona planu atu uza kbitt foun ne'ebé nia hetan iha Austrália hodi loke ninia empreza.

